


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 55 || No. 11

November, 2019



Editor: Rev. Stephen Chinzathang

Synod Kumpuon:

"Kipah kawm a Mangpa nasem" (Late 100:2)

Khristian Tangkou

Vol. No. 55 || Issue No. 11 || November, 2019

A sung thu

Editorial Board

Editor : Rev. Stephen Chinzathang - 9863042789
ct_stephen@yahoo.com

Joint Editor : Rev. Khamchinkhai - 8730933744

Cir. Manager : Upa Jamsianmung - 9862086615
sianmung@rediffmail.com

Bus. Manager : Upa Kamgenpau - 8974612937
Shie T. Ginzahau - 8974438842

Cont. Editors : Upa Khupsuankham - 9856406454
Rev. Awnkhankhup - 9862828921
Rev. Dr. Hangpi Maunlun - 9862910875
Rev. Kaimuanlal - 9862923960

ZOU SYNOD ULIENTE

- **Moderator:**
Rev. Hangpi Manlun
- **Moderator Elect:**
Rev. Zamlianpau
- **Secretary (Sr):**
Upa M. Liensuonkap
- **Secretary (Jr):**
Upa Kapkhanthang
- **Treasurer:**
Upa Chinsuanthang
- **Statistician:**
Upa T. Langkhanmang
- **Executive Secretaries:**
Rev. Stephen Chinzathang
Rev. Khamchinkhai

- Editorial..... 01
- Thu tuomtuom & Thumpi ding..... 03
- Leeng huohhot..... 07
- Khanglaiten Missionary nasepna.. 09
- Biehinnsuhsiengna 12
- Presbyterian dan gelkhietlou 13
- Thuohhat tah a Mangpa ngah 15
- Pasion thugen ding dan..... 16
- Suunna..... 22
- ZPWF Column 23

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



PASIAN Hattuum leh Pawlpi sung ah tahsa a vaihawmna, Pasian thu a ding hingal ki dehtuona kikan-kuotna a sawt taluota hi.

Pasian Gam leh Tahsa gam vaihawmna leh Pasian gam vaihawmna hingal a Tahsa/Khovel pei dan a pei chi thu geelkhawm talei a ut huoi hi. Hattuum kichi Volume masa ah a kigenta hi. Tua ahilai in tunia i gen nuom pen ahileh Pasian gam leh Pasian hina (the essence of God) thei chet tahun kasa hi. Pasian hina leh Pasian Hattuumten i bawl ding uh bawl talei tuate bang tobangte adiei, what do God want me to do as a believer in Christ (Jesu Khrist Mang leh Hundampa a na pom tahleh Mangpa lungsim hol khu nang nasep ding hilou ama, Pasian deilamte khu bang tobangte adieile?

Mt. 22:37-39. Jesun a kungah Mangpa na Pasian khu na lungtang zousie, na hagau zousie in tualeh na lungsim zousie in, na it ding ahi. (38) Tami thupieh masa leh lienpen ahi (39) Ani na khu tambang ma ahi a, Nangma na ki-it bang in na innvengte it in (40) Tam dan thupieh tegel tungah dan thu leh guolneite thu zousie a kikkaikhawm sieng ahi hi.

I. Pasian Hattuum leh gingtute bawl ding “Mt. 22:37-39: “Na lungtang zousie in.....” a chi khu Hattuumten Pasian kung ah i bawl masah pen ding in ka thei hi. Pasian mi, Pasian a pienthana, Pasian a hinna hoitah neite a ding a lungtang zousie a Pasian thu a hin, Pasian khu belpen leh gingtu na hina a na kibulphuna ahiding khu a masapen ahi.

Pasian leh Pasian thu leh ginna lampi puitu hoipen khu Bible leh Khristiante kizilsahna thuginte khu ahi. Tua ahilai in tulai gingu kichi khenkhatten khovel pei dan Hattuum leh pawlpi sung ah hing polut in ginna subua leh tahsa a kideh tuate a hing pieng thei in zong ga (fruit) hoilou tah mimal kihuoatna leh kimudanate a piengsah thei hi.

II. Na Hagau zousie Mt. 22:37-39: Pasian Biehna ah Pasian Hagau toh kipawl lou a Pasian Hagau Siengthou in a puilou Pasian Hagau Siengthou in a sukhah lou (Conviction) apiehlou gingu pen buoina lou ding a buoi in, khovel silte, tahsa silte toh Hattuum Pasian puilou a suoh sah zel hi. Pasian khu Hagau ahia, Hagau toh Bieh ding ahi. Pasian pen buoina panglou ahizieh in Pasian puina leh Pasian thu a hindan hoitah gasuo sahna ding a pan lah ding ahi.

III. “Lungsim zousie” Mt. 22:37-39: Lungsim zousie a Pasian beloute gingu a keniem sah a tualeh ngaisah lou dingte ah buoi uhi. Lungsim zousie a Pasian belouten Pasian biehnah ah a ginna uh a suniem a, gingu Pasian sanga lungsim pieh dohna sil tuomtuom a um thei hi.

Lungsim zousie a Pasian belou i hi chiengleh lungsim chitahlou lungsim siengthoulou leh eima lam a Pasian puina panglou lungsim zousie piehna lungtang neilou gingu atamta a tuachin eima tahsa galdouna pat a pawtdoh ding a kul mamata hi. Tam Laisiengthou Mt. 22:37-39 in eite a hing zilsah ut ahileh Pasian a Pasian pie in len khovel a khovel pie in tuachin Pasian a gingu lungsim kisiemphatna hoitah nei in Mangpa Jesu hing pei kia ding thanuom tah in ngah va ui.

1. Kum leh ha te hing kiheng lamdang zel in mu ding leh tang dinga lam-etna tawm mama a ium lai in Pasian hoina leh akhut hat a kepbitna toh aha sawm leh khatna tan meel hing musahtu Avanglien MANGPA MIN loupi iphat masa uhi.
2. A 15 vei Zou Synod Session thuphasahte bawzuina in November ha sung ipawlpi leh Hattuumte Nipoimawte tam anei a bang ahi. A nuom thei bang leh amanpha thei pen a

Thy tuomtuom leh Thumpi dingte



zang leh mang chiet dingin thumna toh kisakhol chiet vaui.
Tam anei a bangte ahi.

- i) Presbytery chin khawmpi: November 01-03, 2019
 - ii) Synod Annual Audit; November 04-08, 2019
 - iii) Synod Branches Committee: 5th November 20th, 2019.
Ahun: (10:30am) Amun: Synod Office Zomi Colony
3. **Zou Synod kumtawp khawmpi:** 28th Nov. 1st Dec. 2019.
Thupi: “Kipah kawma Mangpa nasem” chi ahi.
4. **Shillong Hattuum kum 21 chinna Anniversary:** Dated 29th September nii outside Manipur a i Hattuum deithaw huoi mama uh Shillong Hattuum Pasion hing hattuum adinkhiet kum 21 chinna Anniversary Pasion kunga nuomthu genna leh Ama thupina piehin nuomtah leh kipah tah a zang zouta uh. Thugenpi in Pro. Pastor Khupsianlal zang uhi. Hagau lam annkuong mai hilou in tahsa lam a dingin lungdamna annkuong sohkhawmna zong nei uhi. Maban hun hingpei touzel ding a Pasion guoljawlna lamchinteng a tangtou zel dingin ithumna uleh i deisahna uh ahi. Thupina mangpa pie un!!!! (Deut. 32:3).
5. **Bangaluru Hattuum kum 10 kchinna Annivesary:** Dated 24th September 2019 niin i Hattuum deithaw huoi mama uh outside Manipur a Bangaluru Hattuum akum 10 chinna Anniversary Pasion kung a kipahthu genna leh Ama thupina piehna in zang uhi. Thugenpi in Pastor Ginlianmang hi ding a, Hattuum kiphu khietdan (Founding member) Pa Suonminthang in tomkim genna nei hi. maban hun a Hattuumte a kalsuon tou zelna ding uah Pasion hoina leh

mapuina zal zoutou zel dingin i deisahna leh i thumna zong ahi. Thupina Mangpa pie un !!!

6. **Zou Synod Gari luipen kileita:** 9th Office Bearer thuphasah bawzuina leh tender a hunchiem abei toh kiton in 27th August, 2019 niin tender form late muna ah hon ahia, khunah Upa Shanti, Singngat in man in piekhiet ahita hi.
7. **Thumsahna Synod Driver:** Pasion umpiina leh akhut thahat a kepbitna toh David Kapkhanthang Synod Driver a sem ahunta chi umlou a ahunzil a khuolzin gige ama leh a inn sung mite adin damtheina leh thuohzawna ngetpieh vai. A sung a tuong passenger ten a zaw lou lai un, aman lam gamla or anai chilou a zou nalai ahi. Ana thumpi zing in !
8. **Lungdampina Promotion mutha:** Hun sotpi SO asepe nua in unau pa Mr. Jamkhopao in SO apat AE ah kaisang hi. Tam i Khristian Tangkou tungton in i lungdampi thu i puong uhi. Ama leh a innsung mite Central Church (MGP) ah kai uhi. maban hun hing pei tou zel ding ah ama leh a innsung mite damtheina leh dinmun sangzawte ngetpieh vai....!
9. **Thumsahna:** Rev. Retd. H. Nengzatun Missionary nasem ding a kuon kia apeisa 25th September 2019 niin Uttar Pradesh a abazaar kaina ah gutaten avan poimaw tuomtuom ana guhsah uhi. Tambang vangsietna atuohna ah ipanpi theina umsun thumna toh bawzui in panpi chiet vai....!
10. **Presbyterian Church Shillong Crusade:** Apeisa October 05-08-2019 sung Presbyterian Church Shillong in unaupa Pa Ginlienmang zang hundamna chielpi (Crusade) nei zouta uh. Pasion in Speaker mang in Ama thu a hagau lam a kiphohthana leh kisiemthana nei uhi. Maban bawzuina pen thumna toh panpi chiet vaui.
11. **Upa teelching thaten exam neizouta uh:** Presbytery chin thaneina toh Presbytery chin a Upa teelthate Presbytery chin in Upa exam neisah ta uhi. Tualeh amauten 29th October 2019 niin Synod Office ah akisaipi Synod ten orientation

neisah uhi. Amaute:

- 1) Manipur Gam Presbytery apat mi - 4
- 2) Manipur Eastern presbytery apat mi - 2
- 3) Zoutang Presbytery apat mi - 3
- 4) Outside Manipur apat mi - 3
- 5) Re-instate dingin mi - 1

= Maban Presbytery chin khawmpi a Setan solnate zieh a taisae mai lou dingin thungetna toh panpi chiet vaui.

12. **NEICC Day of Prayer:** North East India Christian Council Day of Prayer ahina toh Pulpit change zong um ding ahia, khumnah ei Synod apat Central Church leh Tuibuong ah zong uhi. NEICC apat thugen hingpeite navaidawn in na kithuohpi uhi Tuohkhawm pen NEICC a lut ding ahi, Synod Office a submit chiet ding ahi. Ahun 20th Oct. 2019 (Sunday).
13. **Rev. Stephen Chinzathang Sr. Executive Secretary khulzin:** Apeisa October 16th-17th sung Hyderabad ah UCPI National Leader Consultation ah vatel hi. Khumnah Church leaders peikhawmten thupi *“United Christian Prayer for India” ban ah “Call to Prayer and Action to reach the nation”* chi pansan meeting neikhawm uhi.
14. **ZPCS New Delhi in Revival Camp nei uh:** Pasion hoina leh mapuina toh apeisa October 05-08, 2019 sung in Zou Presbyterian Church Synod (ZPCS) Delhi in “Pasion nai vai” chi thupi zang in “Na vinta Retreat House, Suki Dev. Vihar, Okhla New Delhi ah Revival Camp hagau lam a kipawllimna leh kilamthana in nuom tah leh kipahtah in zang zouta uhi. Thugenpi: in Evan. Lunminthang zang uhi. Maban bawzuina pen Hattom leh mimal chin in thumna toh bawzui in panpi chiet vaui. Courtesy: ZGT Oct. 09 issue.
15. **Thumsahna:** ZPWF in outside Manipur a Hattuoimte vehna nei ding: Pasion hoina leh Akhut hat a, kepbitna muongkawm in angtung ding Nov. 08-10, 2019 sung dai dingin tukum ZPWF membrete panlahna toh outside manipur

ah i Hattuumte vena dingin tup leh ngim in nei uhi. Hinaanleh tukum hun um nonlou ahina toh Shillong Hattuumte ve masa ding uhi. Pasion in damna pieh touzel ding kilametna lienpi toh adangte zong kumkia chiengin vetou zel dingin lametna toh kalsuon uhi.

16. **A 13 vei Zou Nampi thumkhawmna:2019:** Dated 9th October nia Zogam Today issue a imu bang un “Mangpan Ama zaudan siemte pouma a deilam uh a tangtung sahding a akikou aw uh aza ding a, ahundam ding hi (Late 145:19) chi pansan in V. Bethel khuo ah a 13 veina Zou Nmpi Thumkhawmna vaiguon lawchingtah in zang zouta uh vaiguon Session ni in khen ua, Session masa: Puitu: Upa S. Jamgenthang pantu: Upa P. Ginthang.
- a) Session- I 10:30am - 11:40am Rev. Retd. Tualzachin (ZPCS)
 - b) Session - II 11:50am - 1:00pm Rev. Thangginmuonlian (ZCBC)
 - c) Kipah thugenna: Pu Chinlunthang President UZO General Hq.
 - d) Thumna leh singpi latna: Rev. Thangginmuonlian (ZCBC) thudang khat ah “THUMNA LAWCHING” chi thupi pansan in Zou Youth Organisation (ZYO) Shillong branch vaisaina in St. Peter Hall, Madanryting Shillong ah ZOU NAMPI THUMKHAWMNA lawchingtah in zang zouta uhi. Tualeh Moreh Block in zong Bieltu Pastor Lamgen zang Zou Nampi thumkhawmna thupi tah in zang uhi.
17. **Biehinn tha Hona:** Dated 18th October 2019 Ningani in Lamka District te pan lahna toh Zomi Bethel Biehinn tha Rev. Zamlianpau Elect. Moderator ZPCS in Honna leh latna nei zouta Ama pen tu leh tu in Lamka District Biel Pastor zong ahi. Tualeh Rev. Khamchinkhai Executive Secretary in Pasion thutah pansan a thugenna tomkim nei hi. Khumban ah Rev. Dr. Hangpi Manlun in singpi latna leh guoljawlna nei in hun khah ahi.



LEENG HUOIHŌI VŌT IN TAPA KHAT NEI

- Upa Khaichinmang
Tongdam P/Church

April 2019 Issued volumel 55 page 15 a, a Leeng huoihoi vawt in Tapa melhoi tah, thumang mama khat anei a, tuachiin a gamsung a mizousie ahankhawm a, mipite kung ah, Nam chin a mizousie in katapa thu mang un achia, atapa in thu ahing gen a, kapa gam sung ah “Kumtawn thei” a um lam thei lou leh a chiin dan ding thei nailou mi nempí a um a, namchin kung ah pei unlen, ‘kumtawn thei’ hiing dingín michin namchin kung a vapei un achia, tam ka thugen zui tapou “Nam” khu ka pa’n supung in anam uh asudam ding hi achi hi. Tuaban ah, thu agen zawm zel a, Nam lah a, nam neu leh hepina hau nam neuté kung ah na nam sung ua ding in, Loubu sawm (10) ah mawpuohna neite’n na nasep dan uh hing gen (report) Sl. No.1-10 tan asepep dan uh agen chietta uhi.

Akhatna apat ngana tan:

- a) Sep leh bawl ding kihau mama ahi zieh in ka innsung mite Buh a um ding a nuom sih ua, Buh ah um man nailou kahi uhi.
- b) “Kei pahpe” ka chiing na lam ua ‘kumtawn thei’ chiing man nailou, hinna tui zong la ngailou, buoh ngailou china akhu.
- c) Hun ka nei lou zieh ua, kumtawn thei chilou ka hi zieh ua, Lei hoi pen apanna ding umlou.
- d) Kumtawn thei kichiingloupi, daikhuom sie dai a panna ding umlou himai...!
- e) Ann zong kine man lou phiel a, kibuoí chiet hinna tui hing la mialmuol ding ha lai va.
- f) Kumtawn thei ga mi chiin dia pieh ding chi pen agen anuom a, akichiinglou bang chi pieh ding hita ...?
- g) Kouteng zieh a, ka nam uh khang kiphasam a um leh zong, bang ilaw ta diei...? aki shi sieng veve ding ka chi zieh uh ahi. Buhpen Thangvil a ka vil thaw uh akhu.

Aguhna apat a gietna: Kouteng thum pen ka innkuon un ka um ua, ka buoi seng zieh un “Kumtawn thei” pen ka ching man tuom

sih uhi. a dang pen ka loite minga seplou bang a sem lou kahi mai uhi.

Akuona: Kei pen keima tang in Buh a ka um a, “Kumtawn thei” ka ching a, ka innkuon a ka kitol lut zieh in a ga umsun zong amuot paipai hi. Daisie in kakai a, hinna tui ka hing la a, leihoi toh hoitan chiing nanlehzong a ga muot thouthou e, thei zou sing e!

Asawmna: Leengpa na chi bang in, huon ka bawl a, sie dai hoitan ka kai a, Leengpa nang kung ah hinna tui ka hingla a, “kumtawn thei” ka buoh a, Buh umna zousie ah kumtawn thei ka ching sah a, hinna tui ka buoh ban ah leihoina toh ka bawl a ahing pou thanuom mama uhi. Ahing ga chieng a, “Kumtawn thei” chiin dan thei nailoute kung a thot doh a, chiin sah ding ka chi hi.

Tuachiin Leengpa’n asepdan uh a ngaikhie a, a sem manlou, Buh a um loute a galvil thawte tung ah a lungthah mama a, a tu bang ua a ga at ding in, Meilipi savawt ah a innkuon un apailut a, athat sieng a, amatang a umte ama chilou a innkuonte zong Meilipi ah athat siengta hi. Tuachiin a gamsung a aum ding tan chi sagi(7) thutanna

abawlta hi.

Thumangpa

1. Na innkuon ua na gam tang buh sung a na um zieh un aga khuaiju bang a hum na neh ding uhi.
2. Luigei a singkung pou, ahuntah a aga bangin, na innkuon un na gah ding uhi.
3. Na innsung mite/nangma chau, mi zousie toh na kilem ding uhi.
4. Na innsung mite’n/nang chau mite gam ah silbawltheina na nei ding ahi.
5. Na innsungmite/nangma chau tumsing bang in na khang zinjen ding uhi/ashi.
6. Guoljawlna chikim in na innkuon un/nangma chau na tang ding uhi.
7. Nou innkuon apat in khang sawnsawn ka siem ding a, na khang uh ka Gamsung ah ateng ding uhi/nang a pat khanggui siem ding a um thei non lou ding zieh in, nangma khu a khang topna nahi ta ding hi.

Tam thu theisiem a, sehnel tung ah koima’n inn lam lou ding ahi. Simtute zousie theisiem dingin Mangpan guoljawl in vangbuoh taken. Amen.

KHANGLAI TEN MISSIONARY NASEPNA A ASATAN UH TOMKIM

- *Upa Khupsuankham*

Pulahna: Khanglai ichi khu mangkam in ‘Youth’ ichi leh nungah tangval lam akawh a, chidan dang khat ah chilei khanglai lam hivan i hattuom level in chita lei PYF lam chizong ahithehi hi. PYF lam ikawhsah ding leh MPYF a danbu phenlei MPYF sung ah mi kum 40 leh anuoi lamte PYF lah a pang thei a kibawl ahia, amaute ahuop deu bang in igen thei ua, hilezong tu in Nungah leh Tangvalte zi/pasal nei nailoute chi deu lei, ithupi toh kimil deu leh kilawm.

Tualeh Mission ichipen Chambers 20th Century Dictionary vel a chi dan zui talei sawlkhie/kuonkhie china lam deu ahuom thei a tuaziehin Mission chipen akawh thei tuomtuom umkha lezong ‘sawl khie’ chi lampang kawh in i bawl ding uhi. Eiten Mission ichi chiengin ikiluoina uh Hattuom china bang ahideu in akilang a, ahin ahi zouzai sih chi thei vai. Semkhe dia kisawl na china ahi. “Khrist hundamna thu puongzah dia kisawl na, kuon khietna, kisawldohna chite bang ahi deu hi.

Tua igen ding pen uh ahileh sawlkhiet a um ding te leh asawlkhe dingte thu igen ding a, tua mun ah ei PYF lamte adia SEAT pieh hileh akilawm thei dan toh igen ding uhi. Ngaidan tangpi in Mission/Missionary

nasem a kuon khie chite khu migun mikumtam leh kum upa chi lam pang deu bang hileh china zong um leh akilawm a, tua leh Pastor a pangte bang kum lam a migun pipi hileh kilawm banga ingaitua danuh um thei hi. Ahivang in tuachi zong ahi tuom sih a, ahituom lou dan i Laisiengthou in ang hilchien hi. Jeremiah, Timothy, Paul loi apat in, Amau tua igente khu naupang a hatlai, khanglai leh PYF ichi sung a umtheite ngentang ahi uhi. Tua hun lai in PYF ana kiphut bang hita leh Paul, Timothy leh Jeremiah ichi te loi khu a Leader ahei, a Secretary ahiei in ava pang ngei ding ua gintatngam ahi.

Khanglai Nungah/Tangval chite leh PYF ichite pen innkuon sung, khawsung leh i Hattuom sung ua asawljang, ajapjang

chite ahi ua, amaute thahatna leh taimatna lim ah i Hattuomte uh akitung ding in, tualeh i innsungte uleh ikhawsungte uh akinga ahi chilei, ichikhielsih ding uhi. A thanuom ua, ataimat ua, a chinop ua ahileh innsung gamsung leh Hattuom sung a dinginmeivah (light) hoitah hi uh a, a poimaw mama hi.

Inu ipate uh Pasion (Mission) nasepna lam ah hakat utsam ma nanlezong innsung khawsahna leh tate naute hinkhuo ding khuolna leh ngaituona in amaute a hatmaw ta ua, ahatnate uh akiem ta hi. Tuaziehin inn mun a abawl thei khawmkhawm uh thungetna, silpieh, hanthawwna chite lama zah a atangjang Nungah/Tangval te kuon khieh ding phamaw ta chilou namah? Thu a vaisaina leh nasepna Foundation dingin nu leh pate pang va'n ei PYF lam pang pen amaute sawl ah Missionary a ang sawlna uh bang leh akulna banga kipieh khiet ding uh angaita hi. Tua khu khanglaite silbawltheina thupi tah khanglai ihi sung ua iisepkhieh ding ua deihuoi mama ahi.

Mangpa Jesu in Mat. 25:14-15 sung i et leh Talent kihawmna thu imu uhi. Tammi talent

kihawmna ah athu poimaw khat a um a, tua khu thu poimaw mama khat ahi. "Ipa Pasion un ka tate hita chia fixed rate a van gih ang gotlou a, eima hatna bang chiet a ang gawt pen vaihawm asiem mama hi". Anntang hita leh Mound khat pawzoute mound khat pawdin asawl a, Kg 10 pawzoute Kg 10 ma pawdin asawl china hi. Mound khat pawzou dingte Kg10 apawsah sih a Kg 10 pawzou va achite mound khat pawdin a paunaw tuom sih hi. Tuapen ei PYF te zong eima haw zawna bang chieta sem dia sawl ihina uh akilang hi. Jeremiah 1:6-7 na ah "Ka naupang chi sin" achia tua khu Mangpa deidan in Jeremiah in anaupanna khu Pasion nna aseppi dia suonlam siemna a azah lou ding china ahi. Eiten zong chithei (suonlam) ding tampi nei kha lei naupang ing bangma theising, zum ing, ka laisim lahlaw, kanu kapa ten hing mamaw va, khum/tammi ka bawl ding ua ichi thei chiet kha ding uhi (Ph. 4:18-19; I Tim.6:18). Sangnaupang khat in Principal kungah suonlam sui in kanu leh kapa damlou, a enkol a inn a pei ding chia suti avanget leh tami naupang

lungsim ah thasietna a um achi san hi. Ei khanglaite pen papi/nupite sangin Pasian nasepna kuon dingin inu, ipate uh sang in talent lienpi ang pengei dingin ikinem uhi. Tua khu tangjang leh hatlai ihi zieh uh ahi.

Rome gieltu in: Thu akigen sih leh bang achi ngaikhieh theita di uoi? Thu gentu sawl ahisih leh bang chin thu khu akigen ta diei? Ginna khu ngaikhieha kipan ahia, tuathu khu Khrist kitang koupi a hing kipan ahi. Koi e kuon ding? Papi/Nupite maw? Mangpa Jesu in (nouten nagen sih ulehzhong) tam naupangte agen sih ulehzhong “Suongnoute kikou nava uh” achia zah ding leh akiphal mihing umsihlezhong suongnoute kuon mama va uh. Hilezhong mihing nasep ding laipi suong noute’n semta uleh zumhuoi isa sih di uoi? ahisih leh phajee ilesah di uoi?

Tuin Nungah/Tangvalte lah ah Mangpa leh agam a dia kuon dingin Isak Maitam a kilaan thei bangzat i um ua? Ama gimthuoh khawsa lou a Mangpa Jesu Singlamte puohpi ngap mi piengtha leh Mangpa siemsa mihing tampi amangthai dingte iit tah tah bangzat i um ua?

Mission/Missioanry nasep lungsim pomite khu iitna tahtah (IKor. 13:) neimi angai hi. Itna khu Pasian a hing kipan ahia, ei leitung miten khumi itna (Mangthai lainatna) dihtah ineisih uleh Isak Maitam a kilat abailam lou ahi. Ahivang in mipiengtha Mangpa’n mangthai hundamna thupitah a sem ding uhi. Khumi iitna tahtah neiloute khu apiengtha tahtah nailou chilei ikhiel sih ding uhi. I mihinpi mihing khat guntui in ataw maiding khu koi e a en ngam ding? I mihing tampi khat guom kuoh ah kie henlen ahunkhe dingin hing hanhan taleh khumi hatna “Aw” zata lechin na hunkhesih ding ama? Tuami khunkhe ding PYF te ma ahatpen, ahangpen leh Mangpa adia kilan ngam pen ahi ding hi. “Ka Mangpa hing hatna banga Isak Maitam a kikilaan in guoljawlna luipi nuomna ahing luong” Aw khanglai Mangpa’n nangma ma ahing hatna hi, chi kingaisut unlen, sawl bang in Mangpa bang ding nei chi ei? Tammun ah ka um hi (kigingsa kahi) chimai un, Aban Mangpa’n ngaitua nava.

Simtute zousie Mangpa’n umpta hen.

BIEHINN SUHSIENGNA

(Johan 2:13-19)

- Samuel Khamsuankhai

Khantanhoi te isim chiengin Jesu Khrist in Biehinn asuhsieng na imu a, hinanleh Johan in Khantanhoi dangte banglou deu hieu in abul lam ah imu hi. Johan in Jesu Biehinn suhsiengna khu abul lam ah amaw in akoi sih a, umze neitah in akoi hi. Azieh ahileh tam Khantanhoi Johan khu Jesu Khrist hina suhlatna leh abiehbu khu heitah a um ahiei chi ahing langсах zaw hi.

Gingtute Pasion Biehinn: Jew miten Pasion khu munchin a um ahidan apom ua, hinanleh agintat dan un Jerusalem Biehinn a teng hidingin a gingta uhi. Tuami zong Biehinn pindan siengthou a Pasion aum hi chi'n agingta uhi. Hinanleh laisengthou isim chieng in mun tamtah a, Gingu te khu Pasion Biehinn ahidan akilang chieng mama hi, I Cor. 3:16-17, "*Noute Pasion Biehinn nahi uhi, tualeh na sung ua Pasion Hagau ateng hi, chi theilou nahi uoi mah? Mi koipouin Pasion Biehinn khu asuhbua leh ama Pasion in asuse ding hi, aziehpén Pasion Biehinn khu a siengthou a, tua inn khu noute nahi uhi*". Jesu Khrist in Jerusalem Biehinn asuhsieng lai in tuami suong a kilam biehinpi suhsieng ahisih a, Pasion Hagau tenna gingtute susieng ahizaw hi. Asuhsieng mai ahisih a, asiengthou thou

ding adei gige hi.

Biehinpi sumkawlveina: Peikan pawihunchieng in Jerusalem ah Israel te mun tuomtuom apat mi tampi ahing peikhawm zel ua, kithoina sillatte bawl in, Biehinpi tax ape zel uhi. Tuami te toh kizawitawn in Biehinpi ah Pharisaité phalna in kithoina ganhing chi tuomtuomte leh Biehinpi Tax piehna ding Rome te sumkhu Jew te sum Shakel in aheng zel uhi. Asilbawlte uh leitung mit a et in bawlthei ma hileh akilawm hi, azieh a Biehna uleh asakhuo lam toh kisai ngen ahi. Hinanleh Pasion thu summet bawlna a aneizieh in Jesu Khrist in aphaal sih hi. Tam khu kizuami toh tekah ahileng hi. Kizua mi in sum amu na dingin atahsa azua hi. Tuachi bang in Jew miten summet suina dingin Pasion biebuah abuh sah ta uhi. Tam pen eima metna

dinga i tahsa subua a Pasion deilam lam leitung toh kizop man na ahia, Paul in I Cor. 6:15, “*Na sapumpi uh Khrist hiengte ahi chi theilou nahi uoi mah?* Ken Khrist hiengte la in kizuate hiengin ka bawl ding adiei mah ? chi’n Paul in ana gen hi. Itahsa Pasion biehin khu bangzieha khovel summet bawl na toh buahsah ding ihei?

Tunia, tam atung a pointe nite tungtawn a igen utpen ahileh Jesu Khrist ginta te hileh Pasion Hagau hei ah ateng ei, Jew te bangin Biehin a um in ikoi ei, ei khu Pasion beihinnpi ihilam ikithei ei? Churachandpur khopi mai hilou in mun tuomtuom ah gingtute umna zousie a, Biehin te ingai thupi mama mai ua, hinanleh Pasion biehin tahtah itahsa khu imanghil kha zel

.....

uhi. Biehin siengthou na ding leh biehin zem hoina ding in sil tampi ingaituo ua, hinanleh itahsa Pasion biehin khu Hagau a zemhoi ding ahilam imanghil kha zel uhi. I inn ah Officer lientah khat MLA ahiei Chief Minister pa ahiei in hing haw ding chileh bangchituh in i innsung ijem hoi in asiengthou theipen in ikoi diei? Bangchituh in ikisinga diei? Tunin Jesu Khrist i Pasion in hing hovang zong ahing chi non sih a, a Hagau toh innsung ah i umkxawmta hi, bangziehin innsung susienglou ding idiei? Mahni metna ding a khovel silte toh buahsah nalai ding idiei?

Simtu zousie Mangpa’n athute theisim thei semsem ding in hing guoljawlta hen.

PRESBYTERIAN GELKHET LOU DAN KHENKAT (ORAL TRADITION)

Issue 29 ban zopna

Rev. Lamsuanthang

- = Hatuom, Biel Chairman hina khu Pastor leh Upa Senior te tanvou deu a koi ahi.
- = Biehin ah numei leh pasal toukhawm ngai ahisih hi, ahin innkuon a tou ut a umleh kham lou a tousah mai ding ahi. Ahin khawmpi or hunnop chieng a mipi tam mama alaam zong um lai chieng in a lem chan theina ding in a ki tou zel hi.

- = Thumna nei chiengin mit sin ding ahi.
- = Khawmpi puitu leh bieh khawmna puitu leh sermon tuten eima touna potsan mun dang a va lam zuoizuo ding ahi sih.
- = Pastor induction hun ah Pastor tha um ding pa sang a naupang zaw in a induct ding ahi sih.
- = Guoljawlna/Benedicgion khu Guoljawlna thumna akichi sih a, guoljawlna akichi lel hi
- = Pulpit ah thugentu subuoi thei dingin pahpe koi lou ding ahi.
- = Pasion biekhawmna ah sil dang neh ding ahisih.
- = Call to worship ah Bible sim zou chiengin Mangpa'n a thu guoljawlta heh chi ding chi Biehna kipuihuoina bu ah a um sih hi.
- = Khawmpi chiengin badge siem jel ahi.
- = Pantu leh Sermon tu in Pasion thu isim ding chiengin "Bible tang sim vai" chi angai sih a "Pasion thu siengthou ngaikhe vai" chi mai ding ahi.
- = Pantu in ut teng gen a utteng kibawl ngai lou hi. Tom leh feltah a biekhawmna ding lat ding ahi.
- = Shina hiel ahilou leh eima Hattuom kikhop ni vel a Programme dang a kinei ngai sih.
- = Nupa ana ki shisante khu RL & RC pieh ngai ahisih.
- = Biena puitu ten la a teel leh a number ban ah tangkhat tan sim suoh zel ding ahi.
- = Hattuom chin in Upa biel asiem ding ahi.
- = Mangpa nitah ann hawm chiengin ZYO singpi hawm dan a ki pass lou a ahawmtu mama in ama khut ngei a zatatna lienpi toh a pieh diing ahi.
- = Sacrament khu a val a um leh Biehinn sung mama a upaten asuhbei ding uh ahi. Damlou pieh ding ahilou leh a val ten biehinn pu a kallou ding ahi.
- = Biehinn sung ah fellowship Programme zah dingin ahi sih. Tualeh leenkawm leh lazil zong a hoi sih hi.
- = Kiteenna ah Programme pat masang in laa akisa ngai sih hi.
- = Thugen tun ama tui vang in pulpit a tup bulbul ding aisih.

- = Pulpit nua lam ah Banner lou sil dang taah ding ahisih.
- = Khawmpi hi in Biehna nei chiengin maitam tunga lawman/Prize a kikoi ngai sih.
- = Biel ah Pastor tha hing lut leh pot ding chiengin standing committee in a vaidawn dingdan leh hahkhiet dingdan vaiguon asiem zel ding ahi.
- = Biehinn ah i lut chiengin thumna a kinei masa zel hi.
- = Biehinn kai chieng in Bible leh Labu puoh teitei ding ahi.
- = Kikhop chieng a smart tah leh siengthou tah kichei ding ahi.
- = Revival leh camping khat poupou nei ding hun ah LCC in hoitah leh gun tah a et masah ding ahi.
- = Khawmpi leh Committee ah a Junior deu ten a Senior deute din khel zungzung chite chiin anei lou ding ahi.
- = Hattuum Upa teelna ah a Biel Pastor khu a pan ngeingei ding ahi.
- = Presbyterian Hattuum member khat khu lamdang deu leh khovel mite chizat thei ding khop in biehnin ah akilam ngai sih hi.
- = Hattuum dang leh pawl dang Vangam kailou ding dan in aki gen ngai sih hi.
- = Hattuum aw/Committee khu Pasian aw a pom Hattuumte akihi hi.



THUOHAT TAH A MANGPA NGAH

Late 103:5: Nakam shilhoi in ahing taisah a tuachin nakhangdawwna khu muvanlai bang a siemtha in aumkia zel ding hi.

Amasan simtu deitahte, Mangpa Jesu min in chibai. Tukum isepguol uh iphattumpi chiet ding uh lamet um kasa hi. Adieh in Date 19/9/2019 zaan a ithupi uh avel a genbe ka ut hi.

Thupi= Thuoh hattah a Mangpa ngah chi ahi. I laisiengthou ah Muvanlai bang in siemtha in a umkia zel ding hi. Muvanlai bang ahia,bvang kichi siemtha ahiei chi isui ding uhi. Muvanlai khu

tung lengva lah a sang lenpen, ahatpen chilei zong ikhiel sih ding uhi. Tuabang a hat leh sanglen hinapi khatvei baa hun anei jel hi. Abaa nikhuo ahing tun chieng leh amul teng pul in, achin leh amuh akitawng hi. Tuachin kolhawm tui umna khat ah akhosa a, tuisieng dawn in nilum oi maimai in aum hi. Tuabang hamsatna tuohkha lou Muvanlai ten atuohkhah chieng un atulum zel uhi. Hinanleh tuobang ana thuoh kha muvanlai ten amu cheing un aneh ding ahing puohsah ua, aneh ding akhiet ding chieng un a eu zai ua, tua khu naneh ding hing puoh ung china ahi. Tuachin

tua annte khu ne in, awl awl in ahing kiduo thah a, achin leh amuh te kitha siem in, amulte ahing poutha ta hi. Vanlaizawl ah ahing leng ta a, nidang a sang in aleni a sang in aleng hatzawta hi. Amit chiin dan zong athupi a, Vanlajawl sangpi apat tuol a meisi vah zong a mu thei hi.

Nangzong Mangpa'n hing panpi ding hi chi zaidaw taha nangah le ahing panpi ngei ding hi. Khangdawngte zong aba ding ua, apuo ding uhi. Hinanleh Mangpa ngahte pen Muvanlai bang in ha in aleng ding uhi. Mangpa'n sismtute guoljawlta hen.

PASIAN THU GEN DING DAN (Homiletics)

Rev. Dr. Hangpi Manlun

1). Thumapui.

I thupi uh 'thugen' chi khun 'thu hil' chinate amaw 'hanthawwna' chinate zong a huop hi. Awle, 'Homiletics' chi khu Greek ham a 'homily' chi akipat a lah ahi a, tuakhu ahina ding bangtah a thugen ding a 'kising sahna' china amaw 'guonggal' chinate ahi. Tualeh, 'homily,' chi khu atomkim in genta lei, thugen ding dan kikawhmuna leh kizilsahna lam khu 'homiletics' a kichi hi.

Tualeh, Sermon chi khu Latin thumal 'sermo' (discourse)-chi a kipat a lah ahi. French leh English-ten, a lahsawn na uah 'sermon' chin i thei uhi. Tualeh, 'Concise Oxford Dictionary' khun, "Sermon khu sahkhuo lam kizilsahna leh kihantawhna thu pulpit apat a puon

khieh ahi” a chi hi.

Ahin, sermon umzie ahileh thugen, thuhil, khantanhoi gen, Pasion thu tangkoupi chinate ahi. Greek ham ah ‘euangelion’ ahi a, ‘Khantanhoi gen’ chi’n zong akiletkhie hi. (Nasepte 8:40; 15:7; 16:10). Tualeh, guolneite, amaw hattuom nnasemtute thugente khu ahi. Tualeh, Bernard Manning gen dan in, “Sermon khu thu tahsa a hing suoh/pieng, thu gel a jau/tel, hamkam a puonkhieh khu ahi” a chi hi.

Tualeh, atomkim in genta lei, Sermon khu Pasion leh a khantanhoi/tanchin puonkhiehna ahi. Tuakhu i thu gen in, Pasion hina gen chet a, Bible thutah a kingah sih leh sahkhuo thu hizong leh ‘sermon’ i chi thei sih ding ua, ‘lecture’ ahi zaw ding hi.

2). Thuhun Lui leh Thuhun Tha ana kizahdante sui va-ui.

2.i). Thuhun Lui hun a Juda sahkhuo a kizah dan. Thuhun Lui ah khun a chil lamin thugen khu nnasepna chi khat mai in angai uhi. Sabbath leh ni poimaw dang kikhopnate uah Dante a sim uhi. Ezra hun laia a kipatin, a anasimpan uhi. Tambang, nite-ah khun ‘Dante’ khu a hambul lam Hebrai ham in

a sim ua, tuakhu, Aramaik ham in a let ua, tuachin Targum a chi uhi. Tami a kipatin Sunagog-a thugen ang kipan hi. Thugentu khu a thugen ding (drashan) a amalam in hoitah in a kisinga diem a, mite thuzaw zou ding a puong ding a lam-et ahi uhi. Guolnei/zawlneiten, zong ahun lai un thu ana gen leng uhi.

2.ii). Thuhun Tha a kimu dan. Thuhun Tha hun in ahileh thugen khu ‘Sunagog’ kikhawpna ah mun poimaw tah a tang/luo hi (Nasepte 15:21). Thugen khu Thuhun Tha a kimu nasa mama a, i gensa bang in Greek hamin ahileh, ‘kerussein’ khu Bible ah 60-vei a kimu hi. Tuabanah, Mangpa Jesu leh Sawltahte khu sermon gentu masate zong ahi uhi. Pentecost ni a, Hagau Siengthou ang tun ni-ah khun, Peter khun mipi hing peikhawmte kungah, Pasionin Jesu Khrist tungtawn a hundamna nna a sep thu leh, Guolneite tungtawn a Pasion thuchiem hing tangtun thu a genna i mu uhi. Tami khu Thuhun Tha huna Sawltahte thu gen i mu masahna pen uh ahi. Tamte banah, Stephen, Paul leh sawltah tuomtuomte thugen zong i mu uhi.

3. Pasion Thugen in atup.

Pasian thugen in atup-le-ngim pen i thei sih u'leh thugen lawching leh lawching lou zong i thei sih ding hi. Tualeh, thu genin a tup-le-ngimte ahileh: i) Mangpa Jesu Khrist tungtang thute, ii) A shina thu, iii) A thawkiana, iv) Mangpen hiding a siem ahithu, v) Guolneite thugen bukimna, leh vi) Mihing in mawpuohna a nei dante zousie leh adangdangte ahuop uhi.

4). Pasian thu (khantan hoi)-kigen zatute umding dante:4.i) Pasian thu gen zatute khu akhelnate uh a kisie ding uh, ii) Khiel ngaidam tang ding in, Khrist kung ah ging loute pui, 4.iii) Nuazui ding siem dingte' (Mat. 28:19). 4.iv) Tualeh, gingtute Khrist bahna lam a suhkhanglien a, suhdet a, hamuonna tansah a, Pasian toh kipawlsah sawm dingte ahi. Tuabanah, Jesun 'Ka belum te vaah in' (Johan 21:16), chite zong ahuop hi.

5). Thugentu hina leh um ding dan. Thugentu ding in Bible tang hoitah asim a, thumna toh akilat masah a, ahitheh leh laibu tuomtuomte sim a kisingisah ding ahi. Tuabanah, kihagau misah a Pasian Hagauin hing pieh dandan chi a pulpit tungvel

suitawm a, agenlou ding ahi.

Thugentu dingte khu a siengthei pen kichei a, mipite tun masang ngei a tun a, a pulpit sung a toupai ding ahi. Tualeh, thugen chieng a thumapui saupipi gen mailou ding ahi. I gen tah leh zong atomtheipen leh i thugen toh kituoh dingte gen giep ding ahi. Akhenten, athugen ding za phiel uh thumapui agen ua, tuakhu anin um mama hi.

Tualeh, pulpit tung a din chieng a guitam thute, kakising saman sih a, kei amawl pen chite khu genlou ding in ahoi hi. Tambang, kamtengte khu kingaangiemna khelna/suol ahileh hi. A lang khat lam ah kithupi sahna thute, mani kiphatna kam teng leh i lawm i paite dem na mun a zah lou ding ahi. Tamte khun angaite suthasie thei lel hi.

5.i). Pilvanna ding dangte:Thugentu pilvanna ding dangte ahileh, pulpit tung a thu igen chiengin, ahitheitan ah mimal min, chi-le-nam min, ham-le-pau a midem, mi hattuom doctrinete demmai, sil kidah thei dingte (etsahna ding zun-le-eh)-chite leh adangdangte mawh genlou hamham sawm ding ahi. Tuabanah, gen sasate zong mawh gen zing lou ding ahi. Nidanglai mi khatin thu

gen ding a pulpit a, adin a Bible asimzou chiengin India leh Pakistan kidou thu ah apan jeljel hi. Khat kia in ahileh leh a thugen teng a, Israelte Kanan gam lutna thu telllouin thu agen ngai sih hi. A khente ahileh thu agen leh min a thugen ding na mathei khin hi.

6). W.E. Sangster in thugentute thei ding a thu poimaw sagi (7)-a gente: Tuate ahi uh leh: 6. i). Thugentu khun thupi angaikhiete a ding a poimaw a tel masa ding hi. 6.ii). Agen masang in tami thu in kei kung ah bang thu agen ei, chi leh tami tungtawn in bang thu e ka gen ding chite ngaituo in a thei masa ding hi. 6. iii). Hilchetna bu, Dictionary/Commentary leh a thugen toh kizopthei a, panpitu dingte sim in sermon asiem ding hi. 6.iv). Athugen toh kituoh ding a, angaituona sil dang hing kilangte zong hoitah achiente ding ahi. 6.v). Athugen ngaikhietu/dingte khu nguntah in theichien masa in, ama-le-ama kidong masa in bangzieh a, tami thu a gen ding e, bang e a, agenna ziente mipi dinmun angiem pen tanpha in angaituo masa ding hi. 6.vi). Athugen ding khu a un sieng in genkhie ding hi. 6.vii). Tamte zousie abawl sawm lai in, nasatahin

thumna toh a ki-singsa ding a, Pasian kung ah thum in akinga zing ding chite ahi uhi.

7). Pasian thu gen khu Hattuum etkolna-le-hagaulam ann vahna/chawmna ahi. Thugen khu hattuum etkolna-le-chawmna ahiziehin, atangpiin thugen ding mite khu, azil mi leh namdet mite bawl ding/tanvou in i ngai tangpi uhi. Tahsa a ineh ann hoi in tahsa ahoisah in, asuhat a, ann hoi lou khu i tahsa a dingin zong damlouna leh sietna tuntheitu ahi. I hagaulam ann zong tua toh kibang ahi. Tualeh, gingtute khu belum toh gente ihi ua, hinanleh belum ibah lou na uh aum hi. Tuakhu ahileh, neh lou ding theitheina i pienpi sih ua, isietpi ding annte zong tuitah in i ne thei uhi. Tuaziehin ann hoi-le-hoi lou khu lamkaite'n a thei angai ua, hoi tah a a etkai zing ding uh ahi.

8). Sermon in thupi khat atun ngeingei ding ahi.Thugen (sermon)-khat i genchieng un, thupi khat tup-le-ngim nei agen sawm ding ahi. Tualeh, suhlat nuom thupi khat na nei khu na sermon pumpi'n azawp suoh sieng ding ahi. Tuabanah, na suhlat sawm thupi khu zong na thei chet masah ding ahi. Na theichet lou thu na gen chet

thei lou ding ziehin, na tangtel ah bulphut inlen, nasim khieh zou chiengin thu dangah lutsan sinlen, kainieh ahiei, na suhlat sawm zopsuoh ding hilou thute zong mawh gen da in.

I thugen khun, Bible thupi atun sih leh meikhu bangin aleng mangthei ding hi. Tuaziehin, Khantan Hoi gentu (sermon)-ah athupi leh amanpha pen khu athu tah tun/suhlat ahipen mai hi. Tuabang ahisih leh thautang kithun lou a avui toh sa i kapchieng aginse maimai toh a kibang lel ding hi. Tuabanah, vei/pona leh deisah kisa sengseng a, ut teng leh vei teng khu Jong sing ba-jap bang a koizap koikoi lou ding ahi.

9). Pulpit khu nel taluo amaw maingap tahluat lou ding ahi. Pulpit khu mun siengthou leh Pasian thu zatat huoi tahtahte gen na mun ahiban ah, na thu gen ngaikhetute lungsim ahilou lam a apuikoi lou na ding in pilvang in. Tuaziehin, pulpit sung athu na gen chiengin, dutui seng kisa a, pulpit beh gopgopte, kengtawtate, ahisih leh pulpit a pat apotdawh atuol lah akoivah kawikawite chin lou ahoi ding hi.

10). Na thugen khu nangma hina hi zel hen. Na thugen

khu ngainuom huoi sah sawm in, nangma dinmun toh kituoh loupite leh na zuilou thute mawh gen ding ahisih hi. Thugen siem leh ngainop huoi mite ngaisangte na mu leh abawl dan uh pong etton sawm sin. Ahisihleh, mite nuizat huoi na hi maimai giep ding hi. Na thu ngaikhetuten nangma hina mama hing ngaikhie uhen len, pulpit tunga kisiem lamdang tawm mai pen mi'n amu nuom ngai sih uhi.

11). Na thugen chieng dutuina bawl tawm sin. Pulpit tung azthugen ding a na din chiengin dutui kholloupi a kituisah tawm chite leh a thu alabei a mawh kaa chite bawltawm sawmlou ham ding ahi. Ahisih leh angaikhietute nuizatna na higiep thei ding hi. Tuabanah, chiemmui thanguoi chite zong pongbawllou ding ahi.

12). Mipite lam et koikoi ding ahi (Eye Contract): Tualeh, thugen chieng a mite etkawikawi (eye contract), zong hoitah nei ding ahi. Kun dedu e, sih khat etet mai chite leh mit sin a vanlam maimai etlou ding, mipi lam ahithei tan et kuol zing ding ahi. Tualeh na khut a mi na kohtah leh zong mikhat/mun khat maimai mawh

kawhlou ding ahi. A hisihleh na koh penpen in ama genna sa thei hi. Tuabanah, thugen chieng a 'noute' chi sang in 'eite' chi zaw lei miten nethei zaw uhi.

13). Aw zah dan. Na aw zah dan a poimaw dan khu, na thugen in mi lungsim athuzaw thei in, athuzaw lou zaw thei hi. Ahoi thei pen in na aw zah sawm in. Mi aw leh umdante zuisawm (copy)-sawm sinlen, mi aw zah dan pong zui ding ahisih hi. Na zui sawm hilou in, abaleng kha ahi leh pen ahamaw sih hi. Tualeh, kikhawm mi atam leh aw sangin gen inlen, atam sih leh lah kipong kou ding ahisih hi.

14) Thadam taha ngaikchieh dingin gen in. Na aw a ultahluot leh angaite dingin zah havan min/chimtah a um ding hi. Na uong gen nuom na munte ah na aw sulamdang in. Tualeh, apoimaw dungzuiin sang sah in na ngiemsah ding ahi.

15). Pilvanna ding dangte. I khohei dan akilawm sih leh ngaikhete lungsim khu na thu a pat in lamang thei ding a, na thugen lungsim lamang theite nang apat in a um ei chi en chien

masa in. Tualeh, na puon nah ban kihip dan, mehkil kikildante, na kivon dante taphot kien chien masa zel in. Ngaikhete lungsim lamang thei ding sil bang ahieite ah khophawh lou in um sin. Na din dan, na bawl dan, na mit hahdante zong endihtu na zi amaw na nei bang zong ahoi hi.

16). Thukhumsin. Tuni-a igen nuom pen uh ahileh biehin ikaichin teng un thugen khu (preaching) a poimaw pen in ikoi uh chi lei zong ichi khiel sih ding uhi. I hagen dan uh toh te in koiman kasiemta chi thei ding a ki-um sih hi. A tung a igente a kipatin, Pasion thugen ahamsat dan leh poimaw dante imu uhi. Thakhat thu in aum piin, zithei pai sih lei zong bangtan e khat beh zuisawm ding ahi. Tualeh, mihingte kisingsahna leh panlahnate khu bangtan e khat a ding in apoimaw mama hi. Ahin, thugen i lawchintheina ding un, tamna igente uh ban uah Bible sim tam, thum tam banah Pasion Hagau Siengthou puina leh umpina toh thu igen leh mite lungsim leh hinkhuo ah nna thupitah a sem ngai ding hi. Mangpa'n simtute hing guolzawl chietta hen aw!!

.....

Pastor Sunn na

REV. KAMKHOJAM MUNLUO (86)



ATANCHIN TOMKIM:

Rev. Kamkhojam Munluo khu (L) Pu Awnneng leh (L) Pi Chingzavung/Chiindon apat Pasion pieh goutan a thumna ahia, 14th March 1933 in Singngat Zoukhopi ah ana pieng hi. Kum 1941 in Pasion thu awi in Pu Tuangin lamkaina in Singngat ah Biehinn ana lam ua, tua khu Zogam a Biehinn masapen ahi.

15th January 1946 in Munpi Mission School ah ana kai a, 25th October 1947 in Pastor Nengthon, Bungmual khut ah Baptisma ana tang hi. Tualeh 1953 in Ngoiphai khuo ah Jou Christian Association (JCA) ana phutkhie uhi. 24th March 1954 in a ji Pastornu Letkhoniang toh Pastor Luaia, Saikot in Hattuom dan in ana kiteng ua, Pasion apat goutan ta pasal-10 leh numei-5 a nei uhi.

15th October 1955 in Buhsau khuo ah Mission School Sangshie sem in School a hong a, 1956 in JCA Khawmpi 3veina in Evangelist Teacher ding in a koi hi. 1959 in MGP Khawmpi, Tualphei ah Pro. Pastor a siem ahia, 1960 in MGP hamsatna ziehin kumpi nasepna S.W. (Medical Department) ah a vasem hi. 1961 in Aizawl Theological Seminary ah Assembly hatna bang in Bible a vazil hi.

14th March 1965 in Cachar Hill Tribes Synod in Silchar ah Pastor in ana namdet a, 12th June 1965 in MGP in Tuining a Pastor sem ding in a koi hi. 30th January 1968 in MEP phutkhie in ana lamkai a, MEP ah Pastor sem in 1988 in MEP in pension ana pie hi. 1989 in PCI(R) ah Pastor nna kum-2 a sem a, 1991 in MEP in a sepna sem zom kia ding in a han kia uhi. 1993 in MEP in Pension a pe kia ua, 1st October 2001-2003 in Manipur Synod in MEP sung a sem ding in ana han kia a, tuachiin Zou Synod apat in Pastor a sep nua in Pension pieh ahi.

1987 in PN. Khovong khuo ana sat a, bangtan ahiei PN Khovong a, a ten nua in Zomi Colony ah khosa in aji toh a kitenna uleh Pasion nna a sep kum 50 chinna (dt. 24.03.1954 to 24.03.2004) Golden Jubilee a lop ban uah Diamond Jubilee (2014 in) zong ana bawl

zouta uhi. Pasion Manggam nna a sep sung in ama khut tungtawn in mi 1903 in Baptisma ana tang ua, ama khut tungtawn ma in 533 Hattuom dan siengthou in a kiteng uhi.

Amin tapte: Pasal - 16

Aman tu pasal-32 leh numei-13 (Agawm-45) anei a, Ata pasalte apat Tusawn pasal-7 leh numei-8 (agawm-15), Ata numeite apat tusawn pasal-13 leh numei-6 (Agawm-19) amu man hi. Ama khu mi guntu lehLaisiengthou sut leh phung leh tang sut detdet mi ahia, tua ahi toh kituoh in thu leh la a doh pen khat ahi hi.

Tambang a hinkhuo a zah lai in Kal lam natna nei ziehin 29th September 2019 (Pasianni) in Lamka District Hospital ah admit ahia, Doctor-ten theitawp a suo nua un dam zouta lou in 30th September 2019 (Seppatni) 10:30pm in a it a ngaiteng nuasie in a tangtawn mun ding zuon in a hing muoliem santa hi. Ala dei: “Ka lung a zuon sun chieng Mangpa hing leng ven ka lungsung ah” A Bible tang dei: Ngai un, Unaute kituoh diil diel a umkhawm anah hoiin, nuom hina va-ia e. (LATE 133:1)



ZPWF COLUMN

September 23, 2019 to 21st October, 2019 tan a Tunnu Limbel panpina pete:

1. Juli Lamneu & Family, Awnchinkap Khuo	Rs.	6,000
2. PWF Hiengdung, Anntang tang	Rs.	1,000
3. Rev. Zamlianpau, Lailam Veng	Rs.	2,000
4. PWF Buongmun, Anntang taang	Rs.	1,000
5 Nu Lunzangai, Central Church	Rs.	200
6. Tv. Paunou, Central Church	Rs.	500
7. Nu Ginchin, Central Church	Rs.	200
8. Khamlunthang, Central Church	Rs.	700
9. Pa Kamkhogin, Central Church	Rs.	200
10. Upa Gouzamang, Central Church	Rs.	50
11. Upa PK Soia, Tuining	Rs.	100
12. Nu Donneiching, Central Church	Rs.	500

13. Tv. Kaplianmung, Central Church	Rs.	500
14. P. Church M. Kholmual, Anntang tang	Rs.	900
15. Nu Luanmang, Lailam Veng	Rs.	1,000
16. Pa Khupkhanmang, Lailam Veng	Rs.	1,000
17. PYF Suolam District tuohkhawm	Rs.	630
18. PYF Tuivai District tuohkhawm	Rs.	732
19. PWF Lamka District tuohkhawm	Rs.	3,000
20. PWF Suolam District tuohkhawm	Rs.	1,250
21. PWF Lentang District tuohkhawm	Rs.	2,170
22. Upa Nengsuanhau, Buongmun	Rs.	2,000
23. PWF Central District tuohkhawm	Rs.	2,507
24. Gunpang District tuohkhawm	Rs.	931
25. PWF Zomi Colony, Anntang Kg. 91 &	Rs.	1,000
26. Lunzamang, Zoumunnuam	Rs.	500
27. Upa Ginsuankhai, Tuining	Rs.	260
28. Ngaikhannuam, Singngat	Rs.	200
29. Hatniang, Singngat	Rs.	200
30. Nu Dimsuanchin, Hiangtam 'K'	Rs.	50
31. PWF Tuibuang, Anntang Kg. 100 &	Rs.	560
32. PWF Zotang District tuohkhawm	Rs.	1,188
33. Nu Zamneilam, Singngat	Rs.	1,000
34. PWF Singngat District tuohkhawm	Rs.	1,593
35. Nu Manngaiching, Singngat	Rs.	2,000
36. Nu Mannianching, Lailam Veng	Rs.	1,000
37. PWF Lunjang, Anntang	Kg.	50
38. PWF Bohlui, Anntang	Kg.	28
39. PWF Zomi Bethel, Anntang	Kg.	25
40. PYF Muollum tuohkhawm (PYF Day)	Rs.	356
41. Upa Kamlianthang, T. Munnuam Anntang Half Bag - 2		
42. MOLVETA, Moreh Line Service-Maicham	Rs.	1,200
43. L. Khuphoiching, Lailam Veng-Chicken (Aahsa)	Kg.	-5
44. Nu Hoipi, Zomi Colony-puonah-14, toka-6, kengkoh-1		

Suhdihna (KhristianTangkou October issue, 2019-ZPWF Column) *Upa Kamlianthang, Moreh-I kichipen Upa Khamlianthang ding hizaw Rs. 10,000

***Petu zousie Mangpa'n hing guolzawl zing taken!
(Adihloul khate Office a suhdih theizing ahi)***

PATRON MEMBER-TE

- | | | | |
|---------------------------|------------------------------|----------------------------|--------------------------------|
| 1. Upa Gouzamang | 2. Pu Hav. Khamchinkhup | 3. Pu Khamzalam | 4. Pu Chinzasuan |
| 5. (L) Upa Liansuanpau | 6. Pu Khamchinthang | 7. Pu S.Dalthang | 8. Upa Kapkhanthang |
| 9. Upa Langginmang | 10. Upa S. Nangkhanlal | 11. Pu S. Lamkthothang | 12. Upa Dr. M. Lachinkhai |
| 13. Upa Khamchinjam | 14. (L) Upa D.K.Manlun | 15. Upa Suankhanmang | 16. (L) Upa Khupgou |
| 17. Upa Chinkham | 18. Upa Ngulchinkham | 19. (L) Rev. V. Vungzalian | 20. Rev. Retd. Kamkhosoi |
| 21. Rev. Retd. Tualzachin | 22. Rev. (Rtd.) H. Nengzaton | 23. Rev. Awnkhanhup | 24. Rev. Dr. Hangpi Manlun Zou |
| 25. (L) Pu Tuanzapau | 26. (L) Rev. Ginchinjam | 27. (L) Rev. Khamzasuan | 28. Upa T. Lamkthothawng |
| 29. Upa Khaichinmang | 30. Rev. Stephen Chinzathang | 31. Pu Khupkhanmang | 32. Pu Khaidohlian |
| 33. (L) Hav. Khamzahang | 34. Pi Vungzanuam | 35. Pu T. Gouzadou | 36. Upa Liensuonkap |
| 37. Pi Zelkhochiin | 38. Pi Hatkhanvung | 39. (L) Pi Ngaihoiching | 40. Pi Mankhannieng |
| 41. Pu Goukhanmang | 42. Pi Chingzalam | 43. Pu S. Thianzakhai | 44. Pi Kamkhanching |
| 45. Pu Haukhanpau | 46. Pu Tuallianmang | 47. (L) Pu Dongkap | 48. (L) Pi Chingkhanmang |
| 49. Pi Donkhanian | 50. Upa Henzakhup | 51. (L) Pu Saichinpau | 52. Pu Goumang |
| 53. (L) Upa Khamkhanhang | 54. Shie Laangkhanlal | 55. Pu Khamkhanlun | 56. Upa L. Tualkhanpau |
| 57. Upa Jamsianmung | 58. Upa Ginzadong | 59. Pu Kaizathang | 60. Pi Goizanuom |
| 61. Pi Thangneivah | 62. Pu Khamzathang | 63. Pi Donchin | 64. Upa Liankhanmang |
| 65. Pu Hauchinlun | 66. Pu T. S. Lal | 67. Pi Goichiin | 68. Pu T. Khupchinthang |
| 69. Upa T. Kaizalam | 70. Pu Paul Henkholal | 71. (L) Pu Soikham | 72. Rev. P.C. Manga |
| 73. Rev. Khamchinkhai | 74. Rev. Jamlianpau | 75. Rev. Chinzapau | 76. Rev. Retd. Kamkhozam |
| 77. Upa (L) Chinpu | 78. Pu Zamkhanthang | 79. Pu Chinglen | 80. Miss Chinhaunieng |
| 81. Upa P. K. Soia | 82. Pu Goukhai | 83. Pi Niangkhanmang | 84. Evan. Retd. G.L. Joshya |
| 85. Pi S. Chingkhanmang | 86. (L) Pu Vumchinkhup | 87. Upa Khaihenthang | 88. Upa T. C. Pau |
| 89. Upa Nengchinkap | 90. (L) Upa Jamkhongam | 91. Upa HT Manga | 92. Mrs. Vahkholhing |
| 93. Pu Hauliankap | 94. Pi Chinnu | 95. (L) Upa Ngulzakhai | 96. (L) Upa T. Gougin |
| 97. Pu Ginsuanhau | 98. Upa (L) Langminthang | 99. (L) Rev. David K.Samte | 100. Upa T.S.K. Samte |
| 101. Upa S.K. Khama | 102. Pu Jamkhopao | 103. Pu Thathang Taithul | 104. Pu Kamkhankap |
| 105. Bhim Prasad Ghatani | 106. Rev. M. Kapsuanthang | 107. Nu Chingneikim | 108. Rev. Khupkhanluan |
| 109. Pi Mannuamching | 110. Rev. Kaimuanlal | 111. Upa Nengkhanlian | 112. Nh. Deborah Zou |
| 113. Pu T. Kuppa | 114. Rev. (L) Mangsuanthang | 115. (L) Pu Lamchinhau | 116. Upa Pauchinlel |
| 117. Nu Kimneihoi | 118. Upa Kamgenpau | 119. Nh. Niangsuannuam | 120. Nu Ngaikhanvung |
| 121. Pu P. Sanjiv Zou | 122. Upa M. Kaichinkham | 123. Upa T. Sianchinpau | 124. Upa Sianzahau |
| 125. Pu L. Thenkhosoi | 126. Pu Kamsuanhang | 127. Upa Th. Kaikholam | 128. Upa Lunchinthang |
| 129. Pu P. Tongthang Zou | 130. H. Nehzamang | 131. Pu Thangsuankhup | 132. Upa M. Kamzadou |
| 133. Pu Jamkholian Munluo | 134. Pu Sianzakhai | 135. Upa Thangginsuan | 136. Pu Kapminlun |

LIFE MEMBER-TE

- | | | |
|----------------------------|--------------------------|-----------------------|
| 01. Upa (L) T. Khupkhenpau | 02. (L) Pu M. Ginzahau | 03. (L) Pu Selzapau |
| 04. Pu L.C. Pautungnung | 05. (L) Pi Khamkhannieng | 06. Pi Ngainuom |
| 07. Upa Chinsuanthang | 08. Upa Shanti Kumar | 09. Pu Kamkhouhau |
| 10. (L) Pu Khamkhouhau | 11. Upa Khamzathang | 12. Upa Chinkhanthang |
| 13. Pu (L) Tongzathang | 14. Pi Chiinneilam | 15. Upa Kulthang |
| 16. H/Sm. Upa Kaichinpau | 17. Pi Niangzalam | 18. Upa P. Doukholun |
| 19. Pu Kapminlian | | |

Undelivered

Please return to:

The Editor

KHRISTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
